

Fas Timoti Nægkiariien sə rani mə nəfe i nəkukuə

Nəkukuə me i Pol rımərai, Fas mine Seken Timoti mine Taetas, kani mə nəkukuə me səvəi pasta me, ti nəri nə mə haməgkiari ia wok mine noien səvəi pasta me. Timoti rınətui fwe Listra. Səvənhi tata iəmə Kris, mətə səvənhi mama pran Isrel. Səvənhi mama ramahatən in ia Nəkukuə Ikinan ia nouihien səvənhi. Pol ramevən maməvisau irəpw nəgkiariien amasan səvəi Kristo. Ia navəniən səvənhi sə ro kəru irə Timoti rukurirə in. In ramasitu ia Pol ia wok səvənhi. Nəpın Pol rımərai nəkukuə i, Timoti ramo wok rəmwhen ia iahtən mine iəmə asori səvəi nakalasia me fwe Efesas. Timoti in tamaruə riti, mətə ruvehi wok səvəi niriien nakalasia me. Ro pen Pol rırai nəkukuə i revən tukwe. Ia nəkukuə i Pol ramasitu irə maməvəhag min ia wok səvənhi. Pol raməvəhag min mə traməkeikei məsiari ti nahatən eikuə me mine nahatəniən me səvənraha səməme həpwəh natukwatukwien. Pol rokeikei pık Timoti, ro pen ruvei pen nəvəhagien me min mə trəfo irə ti nəri nə mə in iərmama riti səvəi Kumwesən.

¹ Iou Pol. Iou aposol riti səvəi Iesu Kristo. Kumwesən sə rauvehimıru kitaha mine Iesu Kristo sə saməmri pen əknekın nətərigien səkitaha irə irau krouni nəkwanrau mə tako.

² Iakamrai nəkukuə i mik, Timoti. Ia nahatətəien səkrau ikəmwhen ia nərik pərhiən. Pwəh Tata

Kumwesən mine Iesu Kristo Iərimənu səkitaha trouəriari pehe namasanien mine napiien mine nəmərinuien mik.

Timoti trinise nahatən eikuə me

³ Fwe kupwən, ia nəpın iakinamevən fwe profens Masetonia, nənə, iakini pehe tukw ik i mə tikamarə pəpım ia taon nəha Efesas. Nərmama nepwın nəha ikın hamarə irəha kamhahatən nərmama ia nəgkiariien sə ropə ia nəgkiariien atukwatukw. Mətə ik tikinise irəha mə tuhəpwəh noien noien nəha. ⁴ Tikini pen ti nirəha i mə tuhəpwəh nətərig pikien ia kwənagei eikuə me mine nəgkiariien sə rani pik kwənəkwus me səvəi kaha kupwən me. Nəgkiariien me nəha kamhəvi pehe a nəvisəien me. Ko həpkasitu mhə ia iərmama riti mə tro wok səvəi Kumwesən. Wok nəha nərmama səməme kamhahatətə a kamho. ⁵ Tikəvhəg m nərmama me səkitaha mə irəha tuhaməkeikei mhokeikei irəha me. Pwəh rerinraha rəmher. Pwəh irəha hamo a noien me səməme irəha həukurən mə ramasan. Pwəh irəha hahatətə pərhiēn ia Kumwesən. ⁶ Nərmama nepwın hənəpwəh noien me i, mhənəti karen, mhəuvavən ti nəgkiariien sə nıpwrən riwən. ⁷ Irəha hokeikei pik nahatənien Loa, mətə həreirei nıpwrəi nəfe kamhəni, nəri auər a mə kamhəgkiari skai tukwe mə həukurən.

⁸ Kitaha səukurən mə Loa in ramasan, mətə nərmama tuhaməkeikei mhahatən nərmama irə ia noien atukwatukw səvənhi. ⁹ Kitaha səukurən mwi mə kipkəmri mhə Loa raməmak ti nəkur atukwatukw me, mətə kəmri Loa raməmak ti nəkur

kamhərui loa, mine nəkur kənkəpwənraha riskai, mine nəkur həpkahətətə mhə ia Kumwesən, mine nəkur kamho noien ərəha, mine nəkur həpko mhə nəkur ikinan me, mine nəkur həpkəmher mhə, mine nəkur kamhousi əpune tata mine mama səvənraha, mine nəkur kamhousi əpune nərmama. ¹⁰ Kəmri Loa raməmak ti nərman mine nīpran səməme kamhəiri əpnəpen irəha me, mine nərman səməme kamhəiri atukw a irəha me, mine nərmama kamhakres iərmama mə tuhoslef irə, mine ieikuə me, mine nəkur kamheikuə ia kwopun kaməkiri nəgkiariien ikın, mine nəkur kamho noien ərəha me nepwın mwi. Ouəh, nīpərhienien kəmri Loa raməmak ti nəkur kamho narimnari me pam nəha sə ramərarki nəgkiariien kamahatən nərmama irə sə ratukwatukw. ¹¹ Kumwesən in rasori mukuraan nərmama kamhəgnəgini in. Nəgkiariien atukwatukw nəha iakani raməmak ia nəgkiariien amasan səvənhi. In rınəmri pehe nəgkiariien nəha ia rəgik, nənə iakaməvisau irapw i.

Iesu rınapi Pol

¹² Iesu Kristo Iərimənu səkitaha sə ramo iakiskai ti noien wok səvənhi, iakani tanak tukwe in ti nəri nə mə in rınəkiri iou mə iakəmwhen, mətigite ia nirak, məmri iou iakamo tukwini nari min. ¹³ Fwe kupwən, iou iərmama riti sə iakani ərəha nəghin, nənə mamometə nərmama me səvənhi, mamousi pik irəha. Mətə in rapi iou ti nəri nə mə iapkini mhə ihi nīpərhienien irə, nənə, mireirei mə nəfe nəha iakamo. ¹⁴ Iərimənu səkitaha rətəgi irapw

namasanien sǎvǎnhi ia nirak rasori pik irǎhar nahatǎtǎien mine nokeikeiien sǎ ruku pen ti Iesu Kristo.

¹⁵ In i nǎgkiariien pǎrhien, nǎnǎ, kitaha pam tsamǎkeikei mhǎni nǎpǎrhienien irǎ. Iesu Kristo rimǎuvehe ia tiprǎnǎ i mǎ truvehimiru nǎrmama ǎrǎha me. Iou iǎmǎ iakǎrǎha anan mǎpi raka pam irǎha. ¹⁶ Mǎtǎ Iesu Kristo rinapi iou mǎ iou iakǎrǎha anan rǎmwhen ia nǎmtǎtien riti sǎ rama-hatǎn mǎ nǎtǎrigien sǎvǎnhi rǎpwǎmwis mipko mhǎ sampam ramevǎn ti nǎrmama ǎrǎha me, pwǎh nǎrmama nepwin hǎtoni mho rǎmwhen sǎ iakino hǎni nǎpǎrhienien irǎ, nǎnǎ in truvei pen nimiruien rerin minraha. ¹⁷ Kumwesǎn in Iǎrimǎnu rerin. In ripkemhǎ mhǎ. Ko sǎpkǎtoni mhǎ. Nǎnǎ in ǎpa in Kumwesǎn. Pwǎh nisaiien mine nǎgnǎginiien krauevǎn tukwe in ia nuk nuk me. Ouǎh, pwǎh ro iaminihi.

¹⁸ Nǎgkiariien i iakani pehe tukw ik i tǎkwtǎkwuni, nǎrik Timoti, rǎmwhen a ia nǎgkiariien me nǎha profet me nepwin hǎmǎni ia niram fwe kupwǎn. Tikuvehi nǎgkiariien me i pwǎh hasitu ia niram ia naruagǎnien amasan sǎ ikamaruagǎn irǎ. ¹⁹ Tikamǎkeikei mǎkwtǎmhiri ǎknekin nahatǎtǎien sǎim, mǎpwǎh noien nari riti sǎ tro ik ikregi fwe ia rerim mǎ ikino nǎrǎhaien. Nǎrmama nepwin ho noien me nepwin sǎ hǎukurǎn mǎ rǎrǎha, nǎnǎ ia noien nǎha hǎnouraha nahatǎtǎien sǎvǎnrǎha rǎmwhen ia nitǎtǎ sǎ rǎpǎruǎ ia nimaha. ²⁰ Iǎmǎ mi nǎha Hameneus mine Aleksanta irau mwi nǎha irǎha

1:15: Luk 15:2, 19:10 **1:17:** Rom 16:27 **1:18:** 1Tim 6:12, Jut 3 **1:19:** 1Tim 3:9 **1:20:** 2Tim 2:17, 2Tim 4:14, 1Kor 5:5

mīnraha. Iou iakinəseni raka irau mə krouəmak ia rəgi Setan pwəh krouukurən mə trouəpwəh nini ərəhaien Kumwesən.

2

Nəvəhagien me ia nikaren səvəi nəfwakien

¹ Nəri sə iakokeikei mə takukupwən mini ro iamīnhi irə. Tikəvəhag m nərmama me səkitaha mə irəha tuhaməkeikei mhəfwaki m Kumwesən ti nərmama me pam, nənə mhəres in mə trasitu ia nirəha, muvei pen nəfe riwən ti nirəha. Nənə tuhaməkeikei mhəni mwi tanak ramevən ti Kumwesən ti nirəha. ² Irəha tuhəfwaki ti kig me mine nərmama me pam səməme kamhəuvehi nasoriien mə kitaha tsarə ia nəmərīnuien mine narəien afafa, mharə irə, mhəsiai Kumwesən, nənə mhesi pen noien atukwatukw me. ³ Noien i ramasan nənə nəpīn Kumwesən səkitaha sə rauvehimīru kitaha trətoni rerīn ragien. ⁴ In rokeikei mə truvehimīru nərmama me pam, nənə mokeikei mə irəha tuhəuvehe mhəukurən nəgkiariien pərhiən səvənhi. ⁵ Kumwesən kuatia a ramarə, nənə, Iərmama kuatia a ramərer ia nīmwrhenhi Kumwesən mine nərmama mavi simwīn irəha. Iərmama nəha in nəha Iesu Kristo ⁶ səriməuvei pehe atukw a in ia nəpīn atukwatukw ti nərəkuien suatuk səvəi nərmama me pam mə trifi irəha ia noien ərəha me səvənraha. Nənə ramahatən mə Kumwesən rokeikei mə truvehimīru nərmama me pam. ⁷ Nəri in i kuvehi utə iou tukwe aposol mine ia hatən səvəi nərmama

2:2: Efes 6:18, Fil 4:6 **2:4:** Esik 18:23, 1Tim 4:10, 2Tes 3:9, Rom 3:29-30, Hip 12:24 **2:6:** Kal 1:4 **2:7:** Wok Me 9:15, Kal 2:7-8, 2Tim 1:11

ripko mhə irəha nəkur Isrel mə takəvisau irapw nəgkiariien amasan mınraha sə raməgkiari ia nahatətəien mine nıpərhiienien. (Iakani pərhiien iapkeikuə mhə.)

⁸ Ro iamınhi irə iakokeikei mə ia kwopun me pam nərman me tuhəuvehi utə rəginraha rəmher, mo ikinani, nənə mhəfwaki m Kumwesən. Irəha tuho iamınha irə mhəpwəh niemaha mine nəvisəien.

⁹ Nənə iakokeikei mə nıpran me tuharkahu ia tinari sə ratukwatukwa, ripko mhə tinari kavi nətərigien səvəi nərman irə, uə tinari kamarkahu i kamərpwi tukwe. Rərəha mə ho nımwai nukwənenraha mə tuhərpwi tukwe uə həuvehi pen marəmarə me kınə ia kol mine perel me, uə harkahu tinari nənimen rutə pik. ¹⁰ Irəha tuhaməkeikei mharkahu ia noien amasan me rəmwhen ia karkahu səvənraha, ti nəri nə mə in i noien atukwatukw sə nıpran me səməme kamhəni mə irəha hokeikei Kumwesən tuho.

¹¹ Nəpın kamahatən nakalasia me, pwəh nıpran me hafafa mhəpwəh nəgkiariien, mhəsiai nahatən me, mhəuvehi nukurənien. ¹² Iou iapkəsəni mhə mə nıpran tuhatətən uə hərimənu ia nərman. Irəha tuhaməkeikei mhafafa, ¹³ ti nəri nə mə fwe kupwən Kumwesən rıməkupwən mo Atam kurirə ro If. ¹⁴ Nənə ripko mhə Atam nə Setan rıməkupwən meikuə irə nənə ro nəkwən, mətə If rino nəkwai Setan nənə mərui nəgkiariien səvəi Kumwesən. ¹⁵ Mətə mə pran raməmwur pen ia nahatətəien, mine nokeikeiien, mine noien sə rəmher

mo ikinan i, nənə in prən afafa, nəpɪn raməmisə ti tɪni mə trətui, Kumwesən trətui amasan tukwe muvehimɪru in.

3

Noien səvəi elta me mɪne tikon me

¹ In i nəgkiariien pərhiən. Trɪni mɪnuə iərmama riti rokeikei mə truvehe iəmə asori sə ramətui ti nakalasia me, nənə, in rɪnokeikei wok riti sə ramanan. ² Iəmə asori sə rauvehi wok nəha noien səvənhi traməkeikei mo iamɪnhi irə. Kəpwəh nətəien noien ərəha riti irə. In səvənhi pran kuatia a. Ripko mhə in iərmama sə ramənɪmwi pɪk, mətə in nətərigien səvənhi raməmak amasan ia nəpɪn me. In iərmama sə kamsiai in. In iərmama sə raməsevər ia rukwənu səvənhi ti nərmama pwispwis me. In iahtən amasan riti. ³ Iərmama sə ramənɪmwi pɪk uə ramousi iərmama ko ripkuvehi mhə wok i. Mətə iərmama sə noien səvənhi ramasan məpou, rəpwəh nəvisəien, mɪpkokeikei pɪk mhə mane, in rukurən nuvehien wok i. ⁴ In traməkeikei miri amasan nərmama kamharə ia nəkwai nimwə səvənhi, nənə mo nɪpwnətɪn me tuhəsiai in mho nəgkiariien səvənhi. ⁵ Trɪni mɪnuə iərmama riti rɪreirei niri amasanien nərmama kamharə ia nəkwai nimwə səvənhi, nənə, trəfo miri amasan nakalasia me səvəi Kumwesən? In rɪreirei noien. ⁶ Iərmama rahatətə vi a ia Iesu ripkəmwhen mhə mə truvehi wok i kamo rərpwi tukwe mɪmwei pen ia nərəhaien sə Setan rɪno nənə Kumwesən rərpwɪn noien ərəha səvənhi. ⁷ Rəmwhen a mwi iərmama sə rauvehi wok iamɪnhi nərmama me fwe iruə tuhaməkeikei

mhəni amasan in kamo in rimwei pen ia kwənkru səvəi Setan nənə kɪni ərəha in.

⁸ Ia noien a mwi nəha tikon me noien səvənraha traməkeikei mo iamɪnhi irə. Irəha nərɪmama səməme kamsiai irəha. Nəgkiariien səvənraha rɪpko mhə kəru. Həpkənɪmwi pɪk mhə nənimwiien skai rəmwhen ia waen. Irəha həpkokeikei pɪk mhə mane. ⁹ Irəha tuhaməkeikei mhəkwtəmhiri noien səvəi nahatətəien Kumwesən rino pui pehe ia nətərigien səvənraha sə rəmher. ¹⁰ Nərɪmama səməme hokeikei mə tuhəuvehi wok səvəi tikon, nakalasia me tuhaməkeikei mhəkupwən mhətə amasan irəha. Trini mɪnuə həpkətə mhə noien ərəha riti ia nirəha, nənə, irəha həukurən nuvehien wok nəha.

¹¹ Ia noien a mwi nəha nɪpran me səvəi tikon me^a noien səvənraha traməkeikei mo iamɪnhi irə. Irəha nɪpran me səməme kamsiai irəha. Rɪpko mhə irəha nɪpran me səvəi nɪniien nɪkare iərmama uə nɪpran me səvəi nənimwiien, mətə irəha nɪpran me səməme nərɪmama həukurən nətigiteien ia nirəha ia narimnari me pam.

¹² Iərmama riti sə rauvehi wok səvəi tikon traməkeikei miri pran kuatia a, nənə, miri amasan nɪpwnətɪn me mɪne nərɪmama pam kamharə ia nəkwai nimwə səvənhi. ¹³ Nərɪmama səməme kamho amasan wok səvəi tikon nəghɪnraha tramasan irə, nənə, irəha tuhəpkehekɪr anan mhə

3:11: Taet 2:3 **a 3:11:** Suatuk riti mwi tɪ nuvsiniien nəgkiariien i ro iamɪnhi irə. “Ia noien a mwi nəha, tikon nɪpran me noien səvənraha traməkeikei mo iamɪnhi irə. Irəha nɪpran me səməme kamsiai irəha. Rɪpko mhə irəha nɪpran me səvəi nɪniien nɪkare iərmama uə nɪpran me səvəi nənimwiien, mətə irəha nɪpran səməme nərɪmama həukurən nətigiteien ia nirəha ia narimnari me pam.”

mhəgkiari ia nahatətəien səvənraha sə ruku pen ti Iesu Kristo.

¹⁴ Təkwtəkwuni nəha, nəpɪn iakamrai nəkukuə i mik, rerik ramrhi mə tripko mhə tui iakuvehe mətoni ik. ¹⁵ Mətə trini minuə iapkuvehe

akwauakw mhə, nənə, nəkukuə i tro nukurəniēn i mik mə nəfe nəha noien ratukwatukw nərmama me ia nəkwai nimwə səvəi Kumwesən tuho. Nərmama ia nəkwai nimwə nəha kani irəha mə nakalasia me səvəi Kumwesən sə ramiru, irəha həmwhen ia pos asori mine nəri skai kauvrhəkin nimwə ia təkuren, mamhirhan nəgkiariēn pərhiēn. ¹⁶ Nənə nɪpərhiēniēn nəgkiariēn i kino pui pehe in nukune nahatətəien səkitaha rani nari riti rasori, mani mə,

“In riməier pehe tukutaha nɪpwran rəmwhen ia nɪpwrataha.

Nənimwɪn Ikinan rahatən amasan mə in iəmə atukwatukw.

Nagelo me hətoni in.

Kəvisau irapw nəgkiariēn səvənhi ia tənəmtənə me.

Nərmama me i ia təkure tɪprənə i həni nɪpərhiēniēn irə.

Kuvehi utə in revən fwe ia neiai.”

4

Pol raməvəhag m Timoti

¹ Nənimwɪn Ikinan rani irapw amasan mə tramevən ipaka ti nəpɪn sampam nənə nərmama nepwɪn tuharaka ia nahatətəien səvənraha, mhəuvən mhətərig pik ia nənimwɪn me səməme

kamheikuə mine nəgkiariien me səməme nəremhə me kamhahatən. ² Nəgkiariien me nəha ieikuə me nepwɪn tuhəni irapw. Nətərigien səvəi ieikuə me nəha rɪnərəha anan ro pen həkregi sas mhə fwe ia rerɪnraha noien ərəha me səməme irəha kamho. ³ Irəha tuhənise iərman ti niriien pran, nənə, mhənise mwi irəha ti nəniiien nəveginien me nepwɪn. Mətə Kumwesən rino nəveginien me nəha mə tukəni. Nənə nərmama səməme kamhəukurən nəgkiariien pərhiien, həni nɪpərhiienien irə, həukurən nuvehiiien, mhəfwaki mhəni vivi Kumwesən tukwe, mhani. ⁴ Nəveginien me pam Kumwesən rino ramasan a. Nari riti riwən nərmama tuhəpwəh nənien. Nərmama həukurən nənien nəveginien me pam trɪni mɪnuə həfwaki mhəni vivi Kumwesən tukwe. ⁵ Nəgkiariien səvəi Kumwesən mine nəfwakiien iamɪnhi krauo nəveginien me pam hamasan a ti nəniiien.

⁶ Trɪni mɪnuə ikani irapw nəgkiariien i m piəvtaha me, ik iərmama riti sə ikamo tukwini amasan nari m Iesu Kristo. Nənə ramahatən mə ikɪmruə ia nəgkiariien pərhiien me səvəi nahatətəien səkɪtaha mine nəgkiariien amasan kamahatən nərmama irə sə ikɪnesi pen raka. ⁷ Tikəpwəh nətərigien ia kwənagei eikuə me səməme nərmama həkɪsɪsɪi mhə ia Kumwesən kamhəni. Nəpɪn me pam tikaməkeikei mamarkut mamə noien me səməme Kumwesən rokeikei. ⁸ Ikukurən trɪni mɪnuə ikamarkut mə nɪpwram trɪskai, noien nəha ramasan. Mətə trɪni mɪnuə ikamarkut nəpɪn me pam mə tiko noien me

4:3: Jen 9:3, Rom 14:6, 1Kor 10:30-31
4:7: 1Tim 1:4, 6:20, 2Tim 2:16

4:4: Jen 1:31, Wok Me
4:8: 1Tim 6:6

səməme Kumwesən rokeikei, noien nəha ramasan məpi raka. Trasitu ia niram ia nimiruien səvəi ipwet mine mine nimiruien sə truvehe kurirə.

⁹ In i nəgkiariien pərhien nənə kitaha pam tsaməkeikei mhəni nīpərhienien irə. ¹⁰ Kitaha samarkut mamhəsese ti nəgkiariien i mə sənəmri pen əknekin raka nətərigien səkitahe ia Kumwesən sə ramiru. In rauvehimiru nərmama pam, mətə in rauvehimiru pərhien irəha səməme kamhəni nīpərhienien irə.

¹¹ Tikəvəhag m nərmama mahatən narimnari me i. ¹² Pwəh nərmama tuhəpwəh nətə puuien ik ti nəri nə mə ik təmaruə a riti, mətə tikəmwur ia nəpīn me mə ik iərmama riti nəkur əfwaki me həukurən nukurirəien təmwki nisum ia nəgkiariien, ia noien, ia nokeikeien, ia nahatətəien, mine ia noien sə ratukwatukw məmher. ¹³ Tikaməkeikei mo wok i səvəi nəvsiniien Nəkukuə Ikinan m nərmama. Tikəvisau mahatən irəha ia nəgkiariien pərhien. Pwəh ruvehe mo səim wok tramərer kupwən ia nimiruien səim meste takuvehe. ¹⁴ Timoti, Kumwesən rīməuvei pehe nasituien səvənhi mik ti noien wok səvənhi. In rīməuvei pehe nasituien nəha nəpīn elta me səvəi nəfwakiien hənəmri utə rəgīnraha ia niram. Ia nəpīn nəha profet me nepwīn irəha mwi həməni irapw nəgkiariien sə Kumwesən rīməni ia niram. Tikəpwəh nəpwəhien nasituien nəha raməmak auər a.

¹⁵ Tikaməkeikei mo narimnari me nəha iakani. Tikamarə mamə wok me nəha pwəh nərmama

pam hətoni nimiruien səim mine wok səim rautə amasan. ¹⁶ Tikətui amasan tukw ik mine nəgkiariien sə ikamahatən nərmama me irə. Nəp̄in me pam tiko iam̄inhi irə. Tr̄ini minuə iko, nənə, tikuvehim̄iru ik mine nərmama səməme kamhətərig ik.

5

Nipran me nərman me səvənraha hemhə mhəpwəh irəha

¹ Tikəpwəh nəgkiari skaiien m nərgharə me, mətə tikəgkiari amasan minraha rəmwhen mə irəha tata me səim. Tikəgkiari m ntəmaruə me rəmwhen mə irəha piām me, ² məgkiari m n̄iprənemə me rəmwhen mə irəha mama me səim. Tikəgkiari m n̄ipran vi me rəmwhen mə irəha k̄itirimam me. Nəgkiariien sə tik̄ini pen ti n̄irəha i traməkeikei matukwatukw pam məmher.

³ N̄ipran me nərman me səvənraha hemhə mhəpwəh irəha səməme kamharə əpa, nakalasia me tuhaməkeikei mhasitu ia n̄irəha. ⁴ Mətə mə n̄ipwnət̄i n̄ipran me nəha fwe uə n̄imwipw̄inraha me, tikahatən irəha i pwəh həukurən mə n̄əri sə irəha tuhəkupwən mho mhəsiai Kumwesən irə, in i tuhətui amasan ti nərmama səməme kamharə ia nəkwai n̄imwə me səvənraha. Noien nəha rəmwhen mə kamhərpw̄in tai nasituien m tata me səvənraha mine mama me mine kaha me. (Noien nəha ramasan ia n̄əmri Kumwesən mamō rer̄in ragien.) ⁵ Mətə pran sə iərman səvənhi remhə məpwəh in əpa anan ramarə, in raməmri pen əknek̄in nətərigien səvənhi ia

Kumwesən. Ia nəp̄in me pam ia nəp̄in mine ia ran raməfwaki m Kumwesən mə trasitu irə. ⁶ Mətə pran sə ro iam̄inhi, tr̄ini minuə ramətərig p̄ik ti narimnari me səvəi n̄ipwran ti n̄iregiiēn ramasan irə, in ram̄iru, mətə ia nən̄imw̄in rəmwhen mə ruvamhə raka. ⁷ Tikuvei pen nəvəhagien me i minraha mə irəha tuhaməkeikei mamho. Pwəh kəpwəh nətoniiēn nərhaiēn riti ia n̄irəha. ⁸ Iərmama riti traməkeikei mətui amasan ti nəkur imwəni me, nənə mukupwən mətui amasan ti səməme kamharə ia nəkwai nimwə səvənhi. Mətə tr̄ini minuə r̄ipko mhə, ramahatən pen mə in r̄ipkhatətə pərhiēn mhə ia Kumwesən. In rərəha məpi raka iərmama sə r̄ipkhatətə mhə.

⁹ Tr̄ini minuə pran riti səvənhi iərman remhə məpwəh in, mətə nuk səvənhi r̄ipkeste mhə ihi sikisti, tikəpwəh n̄irai penien nəgh̄in ia nəkukuə səvəi nasituiēn. Ikukurən n̄irai penien nəgh̄in tr̄ini minuə fwe kupwən səvənhi iərman kuatia a, ¹⁰ nənə nəgh̄in ramasan ia noien amasan me səvənhi, rəmwhen mə rinətui amasan ti n̄ipwnət̄in me mamevən meste həpw̄inari, maməsevər ia rukwənu səvənhi ti nərmama pw̄ispw̄is me, ma-maikuas ia nisui nərmama me səvəi Kumwesən, mamasitu ia iavən ərəha me. Tr̄ini minuə ramo noien amasan me pam iam̄inhi, ikukurən n̄irai penien nəgh̄in ia nəkukuə nəha.

¹¹ Mətə tikəpwəh n̄irai penien səməme həpkəprənemə mhə. Kurirə tr̄ini minuə nətərigien səvəi nesi penien mw̄i iərman ruvehe miskai ia rer̄inraha məpi raka nətərigien səvənraha ia Kristo, nənə irəha hən̄uə tuhesi pen mw̄i nərman, ¹² nənə tukəkiri irəha minuə hən̄o noien ərəha

mhərui nəgkiariien səvənraha mine nəfe həməni fwe kupwən mə tuho. ¹³ Nənə rərəha mwi ti nəri nə mə tuhəuvehe mho irəha rarpaha me, mhəuvən ia nimwə riti mhəier mhəuvən ia riti. Nənə tuhəpkuvehe əpa mhə mho irəha rarpaha me, mətə tuhəuvehe mwi mho irəha nıpran me kamhəni nıkarə iərmama, nənə mhəpwəh noien wok, mamhəni nəgkiariien me rıpkatukwatukw mhə mə tuhəni. ¹⁴ Ro iamınhi irə iakani pen ti nıpran me nəha səməme həpkəprənemə mhə mə ramasan tuhesi pen mwi nərman, mhərəhi nıpwnətınraha me, mhətui amasan ti nərmana səməme kamharə ia nəkwai nimwə me səvənraha. Nənə trini minuə ho iamınha irə, nənə nərmana səməme haməmwəki kitaha ko həpkini mhə nəgkiariien ərəha riti mhəuəsi kitaha irə. ¹⁵ Mətə nıpərhienien nıpran me nepwın hənəpwəh raka suatuk atukwatukw nənə mamhəkurirə Setan təkwətəkwuni.

¹⁶ Nıpran me i səməme kamhəni nıpərhienien ia Iesu tuhaməkeikei mhətui amasan ti nıpran me i ia kwənəkwus səvənraha səməme nərman me səvənraha hemhə mhəpwəh irəha. Irəha tuhəpwəh naraka penien irəha m nakalasia me mə tuhamətui amasan ti nıpran. Nənə ro iamınhi irə nakalasia me tuhəkurən nasituien ia nıpran me i səməme nərman me səvənraha hemhə mhəpwəh irəha əpa anan kamharə.

¹⁷ Nəmə asori me səvəi nəfwakiien səməme kamhəiri amasan nakalasia me, nakalasia me tuhaməkeikei mhəsiai irəha, nənə mhərəku irəha. Tuhəkupwən mho iamınhi irə ia elta me səməme

kamhəsese mamhəvisau mamhahatən. ¹⁸ Iakani iaminihi irə ti nəri nə mə Nəkukuə Ikinan rani mə, “Tihəpwəh nərihi təriniien tərhui kau nəpɪn rameivə testesi kwənuni wit mə tekɪn trier raka.” Nənə Nəkukuə Ikinan rani mwi mə, “Tərmama sə ramowok ratukwatukw mə tukərəkə in.” ¹⁹ Tikəpwəh nətərigien nəgkiariien səvəi iərmama kuatia a sə rani mə elta riti səvəi nəfwakiiien ramo noien ərəha, mətə mə iərmama kəru uə kahar kamharni, nənə, ikətəriɡ ia səvənrahar nəgkiariien. ²⁰ Nənə elta me nəha səməme kamho noien ərəha, tikinise irəha ia nəmri nərmama pam mə elta me nepwɪn mwi tuhəhekɪr noien noien ərəha.

²¹ Ia nəmri Kumwesən, Iesu Kristo, nagelo me səməme Kumwesən rımərfi raka irəha, iakani pehe tukw ik i mə tikaməkeikei mamesi pen nəgkiariien me səiou ia noien sə ratukwatukw. Tikəpwəh noien noien əpə iti m iərmama riti, nənə, mo mwi səpə iti m iərmama riti mwi. Mətə tiko rəmnəmwhen ia nirəha pam.

²² Tikəpwəh nəmri utə akwauakwien rəɡim mi ia iərmama riti məfwaki pen min mə truvehi wok səvəi nəfwakiiien. Trini mɪnuə in iərmama riti səvənhi fwe ikɪn nərəhaien, nənə, səvənhi nərəhaien trarə ia niram rəmwhen mə ik mwi ikiməuvehi nərəhaien səvənhi. Mətə ia nəpɪn me pam tikəmher.

²³ (Ripkamasan mhə mə tikamənɪmwi a nui, mətə ramasan mə tikənɪmwi ouihɪ waen kwopti pwəh rasitu ia tɪpwɪm mɪne nemhəien me sə ramo ik ia nəpɪn me.) ²⁴ Noien ərəha me səvəi nərmama

5:18: 1Kor 9:9, Mat 10:10
Efes 5:11

5:19: 2Kor 13:1

5:20: Kal 2:14,

nepwɪn həuvəier irapw raka, nəri auər a mə nəpɪn sə Kumwesən trərpwɪn noien ərəha irə rɪpkuvehe mhə ihi, mətə noien ərəha me səvəi nərmama nepwɪn tuhəpkier irapw kurirə. ²⁵ Rəmwhen a mwi noien amasan me səvəi nərmama nepwɪn həuvəier irapw raka nənə səməme kamhərkwafə ihi təkwtəkʷuni, irəha mwi tuhaməkeikei mhəier irapw.

6

Slef me tuhaməkeikei mhəsiai nəmə asori me səvənraha

¹ Pwəh slef me pam həsiai amasan nəmə asori me səvənraha kamo nərmama nepwɪn həni ərəha nəghi Kumwesən mɪne nəgkiariien səkitaha samahatən nərmama irə. ² Slef me səməme nəmə asori me səvənraha kamhəni nɪpərhiēnien ia Iesu irəha tuhəpwəh noien nəha kamhəni mə, “Eh, iəmə asori nəha in piəvtaha a riti,” nənə, irəha tuhəpkisiai amasan mhə. Mətə irəha tuhaməkeikei mho pɪk mwi wok ia rerɪnraha pərhiēn, tɪ nəri nə mə səvənraha iəmə asori in iərmama riti sə rani nɪpərhiēnien ia Iesu, nənə irəha hokeikei in. Tikahatən narimnari me i, mɪni pen tɪ nərmama mə tuhaməkeikei mamho.

Noien səvəi nokeikei pɪkien mane

³ Trɪni mɪnuə iərmama riti ramahatən nərmama, nəgkiariien səvənhi traməkeikei mesi pen nəgkiariien atukwatukw səvəi Iesu Kristo Iərimənu səkitaha mɪne nəgkiariien kamahatən nərmama irə sə ro ikinan i. Mə in ramahatən

nægkiariien me nepwɪn ropə ia nægkiariien nəha, ⁴ in ramərpwɪ in, mɪpkukurən anan mhə nari. Nətərigien səvənhi ramemhə rokeikei pɪk nægkiariien ti nəresien me səməme kamhəvi pehe nəmwəkiiien mine nəvisəien. Noien nəha ro nərmama kamhəni ərəha nəghinraha me, nənə, mamhətərig ərəha ia nirəha me, ⁵ ia nəpɪn me pam kamhousari. Noien nəha səvəi nərmama səməme nətərigien səvənraha rərəha. Irəha kamhəruei ia nægkiariien pərhiien, mamhəni mə noien nəkwai Kumwesən in suatuk riti səvəi nuvehiiien mane mine nautə.

⁶ Nɪpərhiienien, trɪni mɪnuə kitaha samo nəkwai Kumwesən, noien nəha trasitu asori ia kitaha, mətə tsaməkeikei mamhagien a, nəri auər a mə səkitaha nautə rouihi a uə rasori. ⁷ Səukurən mə nəpɪn sənətui pehe ia tiprənə i, nənə, mhəpkuvehi mə nari riti mhəuvehe. Nənə nəpɪn tsemhə irə, ko səpkuvehi mhə mwi nari riti mhərərig. ⁸ Mətə trɪni mɪnuə sənətaha nəveginien mine tinari səkitaha rəmwhen a, nənə kitaha tsagien. ⁹ Nərmama səməme hokeikei pɪk mə nautə səvənraha trasori, nənə rɪmərɪ a ti nirəha mə tuho noien ərəha me rɪpɪk. Rəmwhen ia kwənkru riti rəkure tərini irəha ia təpuapəg səvəi nərəhaiien, nənə, irəha hokeikei mə tuho narimnari me rɪpɪk səməme həpkamasan mhə ti nirəha mamhouraha irəha. Nənə nokeikeiien səvəi narimnari ərəha me nəha trouraha nɪmɪruien səvənraha. ¹⁰ Iakani iamɪnhi irə ti nəri nə mə noien səvəi nokeikei pɪkien mane in nukune noien ərəha me səpəmsəpə. Noien nəha

6:5: 2Tim 3:8, 4:4, Taet 1:1413:5 **6:7:** Job 1:21, Pri 5:15

23:4, 28:22

6:10: Efes 5:5**6:6:** 1Tim 4:8, Fil 4:11-12, Hip**6:8:** Prov 30:8**6:9:** Prov

ruvæiri raka raka nærmama nepwîn ia nahatætâien sækitaha, mo irêha ho noien me ripik tækwætækwuni rerinraha ramæmisæ tukwe ræmwhen mæ hæpi atukw a irêha ia nau.

Pol ramævæhag m Timoti

¹¹ Mætæ ik iærmama sævæi Kumwesæn tikaraka mæpwæh nevænien ipaka ti noien ærêha me nêha. Tikamaræ mamø natukwatukwien, mamø nækwai Kumwesæn, mamahatætæ ia Kristo, mamø nokeikeiien, mamærer æknekîn, mamø ik iæmæ noien sæim ramasan mæpou. ¹² Naruagænien amasan sævæi nahatætâien, tikaruagæn iræ, muvehi æknekîn nîmîruien rerin sæ Kumwesæn rinækwein ik tukwe fwe kupwæn næpîn ikimæni irapw amasan nahatætâien sæim ia næmri nærmama hæpik. ¹³ Kumwesæn in nukune nîmîruien. Iesu Kristo in iærmama sæ rimæni irapw amasan nægkiariien pærhien ia næmri Ponjes Pælat. Ia nænimenrau iakani pehe tukw ik i mæ ¹⁴ tikamækeikei mo nægkiariien i kuvei pehe mik. Tiko ia suatuk sæ ræmher. Pwæh nærmama hæpwæh nætoniien nærêhâien riti ia niram. Tiko iamînhi iræ mamevæn meste Iærimænu sækitaha Iesu Kristo truvehe mwi. ¹⁵ Nuveheien sævænhi Kumwesæn tro rier pehe ia næpîn atukwatukw sævænhi. In Kumwesæn sæ kamægnægîni in. In æpa ramærimænu ia narimnari me pam. In Kig sæ rasori ia kig me. Nænæ in Iærimænu sæ rasori ia nærimænu me. ¹⁶ In æpa ripkemhæ mhæ mamaræ rerin ia kwopun riti rukuraan ikîn, nænæ, iærmama riti ko ripkevæn mhæ ipaka. Iærmama riti ripkætoni raka mhæ in,

6:11: 2Tim 2:22 **6:12:** 1Kor 9:25-26, 1Tim 1:18, 2Tim 4:7

6:13: Jon 18:36-37, Jon 19:11 **6:15:** Dut 10:17, Rev 17:14

6:16: Eks 33:20

nənə, tɪpkətɔni mhə mwi. Pwəh nɪsɪaɪien mɪne nərɪmənuien sə tɪpkɪwən mhə krauevən tukwe in. Ouəh, pwəh ro iamɪnhi.

¹⁷ Tikəgkiari m nərɪmama me nautə səvənraha rasori ia nɪtətə səvəi ipwet mɪne, mɪni pen tɪ nɪrəha i mə tuhəpwəh nuvehi utə pɪkɪen irəha, mhəpwəh nəmri pen əknekɪnien nətəɾɪgɪen səvənraha ia nautə, nautə səvəi təkwtəkɪwuni a mətə trakɪwaki rɪwən. Irəha tuhaməkɪkɪ mhəmri pen əknekɪn nətəɾɪgɪen səvənraha ia Kumwesən sə rauvei pehe narɪmnari me rɪpɪk m kɪtaha mə rerɪtaha tragɪen.

¹⁸ Tikɪni pen tɪ nɪrəha i mə tuhaməkɪkɪ mho noien amasan. Pwəh noien amasan me nəha səvənraha hasori mhəmwhen ia nautə səvənraha. Irəha tuhaməkɪkɪ mhasitu mhəriari m nərɪmama. ¹⁹ Noien nəha rəmwhen mə hənɔeite nautə me rɪpɪk sə trasitu ia nɪrəha kurirə. Nənə irəha həkurən nuvehɪen nɪmɪruɪen i nɪmɪruɪen pərɪhɪen.

²⁰ Timoti, Kumwesən rɪnəmri pehe raka nəgkiariɪen amasan səvənhi ia rəgɪm. Tikaməkɪkɪ mətui amasan tukwe, məpwəh nətəɾɪgɪen ia nəgkiariɪen auər a me səvəi tɪprənə i uə nəgkiariɪen me kani mə nəgkiariɪen sə kauvehi nukurənien irə, mətə rekəm neɪkuəien.

²¹ Nərɪmama nɛpɪn kamməkurirə ia nukurənien nəha, nənə, mhənpwəh nahatətəien səvənraha.

Pwəh namasanien tramarə tukumiaha.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416